



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Komunikadu Imprensa
01 Juñu 2022

Loron Internasionál Labarik
JSMP kontinua ejize ba Komisaun F Parlamentu Nasionál atu aselera Lei
Protesaun Labarik no Foin Sa'e iha Perigu

Kada tinan, iha loron 01 Juñu nasaun sira iha mundu tomak komemora loron internasionál ba labarik sira. Loron ne'e sai nu'udar loron ne'ebé nasaun sira iha mundu tomak hatudu sira nia respeitu ba direitu labarik hahú husi direitu ba moris, justisa, edukasaun, saude no direitu sira seluk.

Haree ba realidade moris nian iha Timor Leste hatudu katak labarik barak mak sei hasoru aktu diskriminasaun ba sira nia direitu hodi asesu ba justisa, edukasaun, saúde no mós moris ne'ebé livre husi kualkér violénsia.

Bazeia ba realidade ne'e JSMP kontinua ejize ba Komisaun F atu aselera Lei Protesaun Labarik no Foin Sa'e iha Perigu ne'ebé agora dadaun lei ne'e iha hela diskusaun espesialidade iha Komisaun F Parlamentu Nasionál.

“Relasiona ho komemorasaun loron internasionál ba labarik ne'e, JSMP kontinua ejize ba Komisaun F atu halais ka aselera Esbosu Lei Protesaun Labarik no Foin Sa'e iha Perigu nune'e labarik sira bele goza sira nia direitu fundamentál ne'ebé rekoñese universalmente no hetan protesau tantu protesau espesial no mós protesau sosiál,” dehan Sra. Ana Paula Marçal, Diretora Ezekutiva JSMP.

Direitu labarik sira-nian ba hetan protesau no realizasaun ba sira-nia direitu no garantia fundamentál sira nu'udar norma konstitusionál pragmátika ne'ebé Estadu no parte relevante sira iha obrigasaun atu bele asegura nia realizasaun imediata.

Bainhira Estadu liuhusi nia órgaun kompetente sira ignora hodi la kria medida lejizlativa ka administrativa ka medida relevante seluk hodi fasilita ezersisiu ba direitu, liberdade no garantia fundamentál sira ne'e bele tama iha kategoria aktu inkonstitucionalidade tanba omisaun hanesan prevee iha provizaun Artigu 151 K-RDTL.

Nune'e, kriasaun lei ida ne'e konsidera importante, prioriedade no pragmátika atu halo, importante mak lei ne'e labele ses ka halai liu ka menus husi norma jerál ka prinsípiu sira ne'ebé konsagra ona iha Konvensaun Internasionál ba Direitu Labarik no K-RDTL, hodi bele evita hamosu lakuna ka let atu hamosu fali kriasaun lei barbarak ne'ebé ikus mai hamosu konfuzau no konflitu iha implementasaun.

Relasiona ho esbosu lei ida ne'e, iha tinan kotuk Komisaun F mós konvida JSMP hodi rona JSMP nia hanoin no observasaun sira kona-ba labarik sira nia asesu ba justisa.

Alende ne'e iha fulan Jullu 2021, JSMP mós hatama paraser ba komisaun F ho titulu : Projetu Lei Nú. 29/V/(3a) kona-ba Lei Protesaun ba Labarik no Foin Sa'e iha Perigu hato'o ba Komisaun F, Parlamentu Nasional-Jullu-2021, link : https://jsmp.tl/wp-content/uploads/Paraser-Lei-Protesaun-ba-Labarik-husi-JSMP-Jullu-2021_TETUM.pdf

JSMP hakarak hato'o parabéns ba labarik sira iha mundu tomak, liuliu labarik sira iha Timor-Leste ne'ebé komemora loron espesiál ba labarik nian no hein katak liuhusi komemorasaun loron mundial ida ne'e ema hotu bele hamutuk luta kontra violénsia oioin no diskriminasaun hotu hasoru labarik hotu iha Timor Leste no nafatin asegura labarik sira nia direitu tomak.

Atu hetan informasaun liu tan favor kontaktu:

Ana Paula Marçal
Diretora Ezekutivu JSMP
Telefone: 3323883 | 77040735
Website : <https://jsmp.tl/>